

# Cumissiuun resch nova tracta l'immunitad da Blocher

In president grischun maina l'audiziun

CUN HEINZ BRAND HA DISCURRÌ  
CLAUDIA CADRUVI / ANR

■ **In Grischun stat a la testa da la cumissiuun d'immunitad dal cussegl naziunal. Damaun tracta la cumissiuun ses emprim cas – gist cun gronda atenziun mediala.** Cusseglieier naziunal Heinz Brand (pps/GR) è president da la cumissiuun ch'exista pir dapi questa legislatura e che ha dacurt gi sia emprima sesida. Damaun maina Brand l'audiziun cunter ses collega da partida Christoph Blocher. En connex cun l'affera Hildebrand tschenta la procura publica da Turitg la dumonda da retrair l'immunitad a Blocher che vegn suspectà d'avair violà il secret da banca.

**Tge munti per Vos da presidiar questa cumissiuun resch nova?**

**Heinz Brand:** Per mai munta quai in'incumbensa interessanta. Ma igl è sa chapescha era grev da stuair s'occupar sco noviz parlamentar cun ina tala tematica che stat en il focus da la publicitad e che ha – sin fundament dal cas sco tal – ina atenziun enorma. Ins po pia propi discurre d'ina sfida.

**Christoph Blocher è voss collega da partida. Munta quai betg plitost in impediment ch'ina sfida per Vos?**

Quai na gioga en quest cas betg ina rolla uschè gronda. En emprima lingua vai gea per chaussas giuridicas. Sch'ins surpiglia ina tala incumbensa, ston ins quintar ch'ina dumonda tutga era ina giada l'immunitad d'in collega da partida. Quai è uss simpelmain uschia.

**Tge han ins stuì preparar per pudair tractar damaun l'emprim cas e per manar atras l'audiziun?**

Ins ha l'emprim stuì definir tenor tge principis che la cumissiuun lavura. Ins ha fatg in'emprima survista ed ha cumenzà las preparativas – che n'èn anc betg terminadas. Suenter han ins stuì pinar tiers il cas concret e sclerir ils



puncts giuridics necessariis per la sesida. Quai è stà pli u main la lavur preparatorica dal president – abstrahà da la fom infinita sin infurraziuns da las medias ch'èn sa patru-nadas da mes temp durant las ultimas emnas.

**Fin il 2011 ha il parlament tractà sez las dumondas pertutgant l'immunitad. Uss ha la cumissiuun da decider. Pertge han ins midà il sistem?**

Ins ha vulì prender la tematica ord il focus da la publicitad. Gist quest cas cun Christoph Blocher fiss gea puspè adattà per nizegiar la tribuna dal parlament per truschattar tschertas suppinas politicas ed evocar in cumbat politic che n'avess da far nagut cun la dumonda d'immunitad.

**Èsi tenor Vos meglier da tractar la**

**dumonda d'immunitad davos portas serradas?**

Jau na sai gea betg co ch'igl era pli baud en il parlament. Ma uss ha la cumissiuun la pussaivladad da planisar e preparar la chaussa a moda conscienziusa.

**Tge è uschiglio anc nov, pertutgant l'immunitad per ils parlamentariss?**

Las reglas èn daventadas pli rigurusas. Pli baud han ins ditg ch'ina violaziun presumada stoppia star en connex cun il mandat parlamentar. Oz hai num ch'ina violaziun presumada stoppia avair in connex «direct» cun il mandat. Ins ha sappientivamain augmentà las pretensiuns. Ins n'ha betg vulì che x-in delict croda sut l'immunitad. Tge che tut quai munta per propi, ston ins l'emprim anc definir cun l'applicaziun da dretg.

**Quantas dumondas hai dà fin uss per retrair l'immunitad a parlamentariss?**

I ha dà radund quaranta dumondas dapi il 1980. En trais cas n'è il parlament gnanca entrà sin la dumonda. Pertge ins ha ditg ch'il delict presumà n'haja da far nagut cun il mandat da parlamentari, per exempel a sias uras tar cusseglieier naziunal Jean Ziegler per vi da ses cudesch „Die Schweiz wäscht weisser“. Tar las dumondas, sin las qualas il parlament è entrà, n'han ins dentant – tenor mes savair – betg retratg l'immunitad ad in parlamentari. La suletta giada ch'ins ha retratg l'immunitad è stà tar Elisabeth Kopp che n'era betg parlamentara, mabain cusseglieiera federala.

**Èsi pussaivel che Vossa cumissiuun decida da betg entrar sin la dumonda da la procura publica da Turitg?**

Quai è senz'auter pussaivel ch'ins decida da betg entrar.

**Sche la cumissiuun n'entra betg sin la dumonda, tge munta quai per la procura publica?**

Quai munta che la cumissiuun nega il connex cun l'incumbensa parlamentara.

**E lura n'èsi gnanca necessari da retrair l'immunitad?**

Exact. Lura po la procura publica cun- tinuar la persecziun penala.

**I n'è gea era betg cler, sch'il delict presuma pertutga insumma gia il temp d'uffizi da Blocher. Plinavant n'èsi era betg cler, sch'i vala anc il dretg vegl u il dretg da la nova legislatura per quest cas.**

Quai èn atgnamain anc dumondas preliminaras che pertutgan il champ d'applicaziun.

**A partir da cura è in cusseglieier naziunal en uffizi? A partir da sia elecziun u pir suenter la saramentaziun? Ha la cumissiuun gia chattà ina resposta giuridica?**

Sin questa dumonda vegn ins a stuair dar ina resposta. Sch'ins ha gia chattà la risposta, na poss jau per il mument anc betg dir.

**En gliez cas è quai in punct che la cumissiuun vegn a discutir la mesemna.**

Gea.

**Crodan las decisiuns gia damaun u vai pli ditg?**

La mesemna avain nus nossa sesida e vegnin en mintga cas ad orientar las medias. Tut tenor tge cumprovas ch'i dovra anc, datti anc ina segunda u terza sesida. Ma igl è era pussaivel che las decisiuns finalas crodan gia la mesemna.